



কবিতায় সাতই মার্চ

কাইউম পারভেজ

ভায়েরা আমার ।
আজো ভুলিনি সে হুংকার ।
দুঃখ ভারাক্রান্ত মন নিয়ে আজ হাজির হয়েছি সামনে
বললেন তখন জনতা বললো ভয় নেই আছি সঙ্গে ।
কী অন্যায় করেছিলাম?
প্রশ্ন করেই জানিয়ে দিলেন মুক্তির পয়গাম ।
এদেশের মানুষ মুক্তি চায় – আত্ম অধিকার চায় ।
এই তো যেন সেদিনের কথা যে কথা ভোলার নয় ।
প্রধানমন্ত্রীত্ব চাই না - এদেশের মানুষের অধিকার চাই ।
পাকি শোষকরা জানলো এবার তাদের রক্ষা নাই ।
আমরা তোমাদের ভাতে মারবো আরো মারবো পানিতে
শোষকেরে তিনি বললেন যারা চায়নি ক্ষমতা ছাড়িতে ।
তোমরা আমাদের ভাই তোমরা ব্যারাকে ফিরে যাও
বললেন যদি না মানো তবে শেষ কথা শুনে নাও ।
আর যদি একটা গুলি চলে যদি কর আর লোক হত্যা
বাংলার মানুষ জেগেছে, জেগেছে ছাত্র শ্রমিক জনতা ।
তোমাদের উপর কাছে আমার রইলো অনুরোধ
প্রত্যেক ঘরে ঘরে দুর্গ গড়ো নিতে হবে প্রতিশোধ ।
তোমাদের যা আছে তাই নিয়ে কর শত্রুর মোকাবেলা
ঘোষণা দিলেন প্রাণ বিনিময়ে স্বাধীন করবো বাংলা ।
আরো বললেন - রক্ত যখন দিয়েছি তখন রক্ত দেবো আরো
খান সাহেবেরা বাঁচতে চাইলে এবার বাংলা ছাড়ো ।
এদেশের মানুষকে মুক্ত করে ছাড়বো ইনশাআল্লাহ
দৃঢ় প্রত্যয়ে হুংকার দিলেন বুকে নিয়ে আল্লাহ ।
এবারের সংগ্রাম আমাদের মুক্তির সংগ্রাম
মুক্তিযুদ্ধ ছড়িয়ে পড়লো শহর বন্দর গ্রাম
এবারের সংগ্রাম আমাদের স্বাধীনতার সংগ্রাম ।
বিশ্বজুড়ে জানলো সবাই বাংলাদেশের নাম ।
সেদিনের সেই রেসকোর্সে হাঁকলেন 'জয় বাংলা'
জয় বাংলা ধ্বনিতে স্বাধীন মুজিবের বাংলা ।